

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 58/8

30 դեկտեմբերի 2015 թ.

Քննարկվեց քաղաքացի Հայկ Հովհաննիսյանի 08.12.2015 թ-ի դիմումով բերված պահանջը ՀՀ ՖՆ իրավաբանական վարչության պետի 08.10.2015 թ-ի թիվ 329/04 որոշման կատարումը կասեցնելու վերաբերյալ:

Քաղաքացի Հայկ Հովհաննիսյանի դիմումում բերված փաստարկները.

Հարկ վճարողից ժամանակին չգանձված հարկային պարտավորությունների գծով վճարման ենթակա գումարը գանձելու մասին ՀՀ ֆինանսների նախարարության իրավաբանական վարչության պետի կողմից 08.10.2015 թ-ին կայացված թիվ 329/04 որոշման համաձայն, Հայկ Հովհաննիսյանից պետք է գանձվի 825.832 դրամ որպես ԱԱՀ-ի պարտավորության գումար, որից 666.800 դրամը որպես հարկ, 59.012 դրամը որպես տույժ, իսկ մնացած 100.020 դրամը որպես տուգանք: Պարտավորությունն առաջացել է 2015 թ-ի ընթացքում ավտոմեքենաների իրացման երկու գործարք իրականացնելու արդյունքում «Ավելացված արժեքի հարկի մասին» ՀՀ օրենքի 6-րդ հոդվածի 1-ին ենթակետի համաձայն առաջացած գումարներն օրենքով սահմանված ժամկետներում չվճարելուց և հաշվարկված տույժերն ու տուգանքները չվճարելուց:

Վերոնշյալ որոշումը փոստի միջոցով ստացվել է 2015 թ-ի հոկտեմբերի 13-ին:

Հայկ Հովհաննիսյանը հայտնում է, որ երկրորդ ավտոմեքենայի գնման և օտարման գործարքներն առոչինչ շինծու գործարքներ են և ամենաուշը մինչև 2015 թ-ի դեկտեմբերի 11-ն այդ գործարքների անվավերության հետևանքներ կիրառելու, ինչպես նաև այդ գործարքների նկատմամբ, հաշվի առնելով դրանց էությունը, այն գործարքին, որը կողմերն իրականում նկատի են ունեցել այդ շինծու գործարքները կնքելիս, վերաբերող կանոնները կիրառելու պահանջով քաղաքացիական հայց է ներկայացվելու համապատասխան ընդհանուր իրավասության դատարան: Այդ հիմքով Հայկ Հովհաննիսյանը խնդրում է կասեցնել վերոնշյալ որոշման կատարումը, իսկ դատարանի վերջնական դատական ակտն օրինական ուժի մեջ մտնելուց հետո կներկայացնի ՀՀ ֆինանսների նախարարության համապատասխան մարմին:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով Հայկ Հովհաննիսյանի վերաբերյալ վարչական վարույթի նյութերը պարզել է, որ ԱԱՀ-ի գծով նրա չկատարված հարկային պարտավորությունը կազմում է 825.832 դրամ, որից 666.800 դրամ հարկ, 59.012 դրամ տույժ և 100.020 դրամ տուգանք: Նշված պարտավորությունն առաջացել է Հայկ Հովհաննիսյանի կողմից 2015 թ-ի ընթացքում երկու օտարման գործարք իրականացնելու արդյունքում «Ավելացված արժեքի հարկի մասին» ՀՀ օրենքի 6-րդ հոդվածի 1-ին կետի համաձայն առաջացած գումարները օրենքով սահմանված ժամկետներում չվճարելու հետևանքով:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ՖՆ իրավաբանական վարչության պետի կողմից 08.10.2015 թ-ին ընդունվել է թիվ 329/04 որոշումը (այսուհետ նաև Որոշում) Հայկ Հովհաննիսյանից 825.832 դրամ պարտավորության գումար գանձելու մասին:

Քննարկվող դեպքում, Որոշմամբ Հայկ Հովհաննիսյանից ԱԱՀ-ի գծով պարտավորությունների գանձման առաջադրման համար հիմք է հանդիսացել այն հանգամանքը, որ նրա կողմից իրականացվել է «Ավելացված արժեքի հարկի մասին» ՀՀ օրենքի 6-րդ հոդվածի 1-ին կետի «բ» ենթակետով նախատեսված ապրանքի մատակարարման գործարք, այն է՝ մեկ օրացուցային տարվա ընթացքում երկու և ավելի թվով անգամ կատարվել է նրա սեփականությունը հանդիսացող ավտոմեքենաների օտարում, որոնցից երկրորդն օտարվել է դրա ձեռքբերմանը հաջորդող մեկ տարին չգերազանցող ժամանակահատվածում:

Ըստ դիմումի, երկրորդ ավտոմեքենայի գնման և օտարման գործարքներն առոչինչ շինծու գործարքներ են և ամենաուշը մինչև 2015 թ-ի դեկտեմբերի 11-ն այդ գործարքների անվավերության հետևանքներ կիրառելու պահանջով քաղաքացիական հայց է ներկայացվելու համապատասխան ընդհանուր իրավասության դատարան: Այդ հիմքով Հայկ Հովհաննիսյանը խնդրում է կասեցնել Որոշման կատարումը:

Վերոգրյալի կապակցությամբ հարկ է նշել, որ սույն գործում առակա չէ որևէ ապացույց, որը կհիմնավորեր Հայկ Հովհաննիսյանի կողմից գնված և օտարված երկրորդ ավտոմեքենայի գործարքներն առոչինչ շինծու գործարքներ հանդիսանալու հանգամանքը: Բացի այդ, Հայկ Հովհաննիսյանի բողոքի համաձայն մինչև 2015 թ-ի դեկտեմբերի 11-ն այդ գործարքների անվավերության հետևանքներ կիրառելու պահանջով քաղաքացիական հայց է ներկայացվելու համապատասխան ընդհանուր իրավասության դատարան: Սակայն, սույն բողոքի քննության օրվա (30.12.2015 թ-ի) դրությամբ առկա չէ որևէ ապացույց երկրորդ ավտոմեքենայի գնման և օտարման գործարքների անվավերության հետևանքներ կիրառելու պահանջով համապատասխան ընդհանուր իրավասության դատարան հայց ներկայացված լինելու վերաբերյալ: Հետևապես, նման պայմաններում, Հայկ Հովհաննիսյանի Որոշման կատարումը կասեցնելու վերաբերյալ պահանջը հիմնավոր չէ, այն չի բխում ՀՀ օրենսդրության պահանջներից և ենթակա է մերժման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

Քաղաքացի Հայկ Հովհաննիսյանի 08.12.2015 թ-ի դիմումով բերված պահանջը մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական վարչության միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Գ.ՄԻՐՈՆՅԱՆ